

2 Oritxi Mahãdu-ò 2 Oritxi Hãwã Dohodỹna Mahãdu-ò

¹ Jiarỹ, Paulo, Deuxu deòduõ watzireri Deuxu-deewireki. Tahe katyyriti rewahinyrenyre Oritxi hãwã dohodỹna mahãdu-ò. Iny seriòreneny Tximòtxi wawana ihỹre. Tule rewahinyrenyre ibutu ityhydỹdu mahãdu roholakemy Akaia bedeki.

² Ruxetòena, ywina-wana adeereny kanakemy idi watzireri Deuxu inytybyreny-ribi Jesuisi Kristu Inynyrỹ-ribi.

³⁻⁴ Deuxu heka Jesuisi Kristu tyby rare. Iny wiòhedỹdu ihỹre. Ruxetòena sòwemy inydeereny riwahinymyhỹre. Ibutumy aòmydỹna-di riwiòhenanymyhỹre. Tai tahe iny witzira rikiwiòhenanyrenykre Deuxu wiòhedỹna-di.

⁵ Iwese Kristu aòhòkỹmy dỹnana kaiboho teerytenyte wese, Kristu wiòhedỹna bitamy bierybenyke.

⁶ Jiarỹboho aòhòkỹmy arotỹnyrenykreu, awiòhenadỹrenykre tuukre. Tai tahe tarasana iribi bitake. Deuxu-ribi wiòhedỹna arimyrenykeki, kia biu-ò hena iribi bimnye arawiòhenanyrenykre. Tai tahe kaiboho arururenydikre aòhòkỹmy botỹnybenykreu.

⁷ Tahe wararòsòna sòwemy ihỹre akireny. Tiubo aòhòkỹmy dỹnanamy botỹnybenykreu tule wiòhedỹna bitabenyke iwese aritarenykre wese.

⁸ Waityhydỹdu seriòre, Asia bedeki jiarỹboho sòwemy aòhòkỹmy ratỹnymy roiremahã. Wadeereny heka isiratyhyre ibede-ki. Tai

heka raberumy roiremahã arururenyke lau.
⁹ Rahõtinyrenyre tai wakananareny sana. Kiamy heka wadeereny ditÿnynyde bedeernamy: ixi-di inyõ nohõtiõmy, Deuxudihyyle wahe. Tii dori rubu-ribi ixixadu rare. ¹⁰ Inatyhymy tii riwatarenyre kia brebuna-ribi. Ibutu aõna aõna-ribi riwatarenykre ixityre. ¹¹ Kaiboho dori wadeereny Deuxu-ò textitõenytenyteri. Tahe ibutumy ixitõena-ò Deuxu kodoholakre tai riwiõhenanykre. Tahe ibutumyiny Deuxu riteàlànanykre.

¹² Ibutumy jiarÿboho heka kia Deuxu-deewimy rewinymyhÿrenyre. Tai heka wadeysarenyre jiarÿboho. Awanareny heka tule rarybemahãrenyre: õbitinamy, Deuxu rurunamy. Iny raykywydyna-di aõkõ wahe, Deuxu raykywydyna-di. ¹³⁻¹⁴ Idi mariakele, biritinykele, bierykele, kia reritinyrenyre adeereny. Wiji urihimyõle teerymy toite. Jesuisi txu tahe ibutumy bierybenyke. Jiarÿboho areysarenykre bierybenykeki wahe. Tule kaiboho beysabenykre.

¹⁵⁻¹⁶ Juhuu rahõtinyre kiawesemy: arakemy ixi-di rahõtinyre. Juhuu heka Macedonia hãwã bede-ò arakemy ixi-di rahõtinyre. Iule tahe aroramy arakemy heka ixi-di watxiwãhã. Òkeseu tasÿ tule, aroramy adehemynykre. Tai wiõhena inatximy bitake. Jiarÿ ayrenymy areakreu, Judeia bede-ò arakemy kaiboho biwawiõhenanybenykemy. ¹⁷⁻¹⁸ Reõsamy watxirerimy aõbohe wadi tahõtinytenyteri? Ixiõrarukile aõbohe tuuremy adee araÿraxikre? Tuu aõbo iximy rarybere

kohe, myÿ, iule. Aõkõre, myy rarybere, iule wahe. Inatyhymy aõbohe rarybereri. Aõkõre rarybeõre. Jesuisi Kristu heka warybe rierye. Kohe, myy, iule. ¹⁹ Tai heka raryberenyre: — Inatyhy rare. Myÿ wahe, Deuxudeewinamy. Sila Tximòtxi-wana kia Deuxu rybe-di adeereny ritÿnynyre, Jesuisi Kristu iriòremy, jiarÿ tule adeereny kia retÿnynyre. ²⁰ Inyboho ratximyhÿre Jesuisi Kristu-ò. Kristu heka Deuxu widÿÿdu ratxireri. Inyummyreny ratximyhÿre. Deuxu heka tuu iny rierynanyhÿrenyre, tii inatyhy. ²¹⁻²² Tii heka iny ritamyhÿrenyre; rihitximyhÿrenyre; tahõrõ mahådumy riwinyre. Inydeereny riwahinyre Deuxu Tyytybytyhy inyworeny-ò risÿnyre. Tai heka inyboho rõhõtynyrenyre inydeereny ibutumy riwahinykremy.

²³ Deuxu heka warayky rierye. Tai heka rarybemahãre, inatyhy raõre Oritxi hãwã-ò. Tai heka adiride ixinamy. ²⁴ Araryberenyõtyhy jiarÿboho aõbo bityhynybenykemy, mary-bebenykemy. Kaiboho dorihe inatyhyna tetyhynytenyte. Urile tahe arawiòhenanyrenykre deysana-di Deuxu Tyytybytyhy dee deysana-di.

2

¹ Tai wawo rerahõrera. Arakemy aõkõ abedeòtiidÿÿrenymy ixityre.

² Arabedeòtiidÿÿnyrenykeki tahe mobo riwateysanykre. Kaibohole toite. ³ Tai adeereny reritinyre. Anaõtyhy heka abedeòtiidÿÿrenymy. Kaiboho dori deysana-di biwasÿnybenyke. Iu wadeysamy watxireriu, kaiboho tule beysabenykre. Kia heka reerywiwire jiarÿ.

⁴ Adeereny reritinyre bedewona-di ranywãhãu; warube rytynmahã. Bedeòtiidỹna-di arasỹnyrenykemy aõkõ kỹny. Tahe timybo aluurenyremy kaiboho bierybenykemy adeereny reritinyre.

⁵ Bedewonamy relyykeki, tiu inyõ wii ribedewonyreu, riwabedewonyõtyhy. Aõtxi arabedewonyreny. Waryberiti isirare aõkõ ihỹre. ⁶ Aõhõkỹmy dỹnanamy yla aõkõ rotỹnyre. Tai ixinamy rarekre wiji. ⁷ Wiji tahe iwitxira aõmydỹnana biwinyke: biwiòhenanyke iixãwididỹnadikemy. Tai tahe bedewona-di sõwetyhymy riatyõtyhy bedewona-ribi wahe. ⁸ Tii luunatyhy-di bierynanybenyke.

⁹ Tai heka adeereny õnosõna rewahinyre. Tai juhuu waritidỹna adeereny rewahinyre. Jiarỹ heka kaiboho rexiywinymy aõbo atxitenyteri ityhydỹna-ò. Kiamy adireny watxireri.

¹⁰ Kai biixãwididỹnykeki heka, jiarỹ tule ariixãwididỹnyke. Kia adeereny rikiwinyrenyke Kristu òraru-ki. ¹¹ Tahe Satanasi tiu iny riatoryenyõtyhy. Inyboho rieryrenyre tii kia riwinykemy riwisỹnymyhỹré.

¹² Jiarỹ heka ròirenyre Troaji-ò Rybewihikỹ tỹnydỹmy Kristuni-di. Tamy retehemynyreu, isiraõlemy tai Rybewihikỹ dohodỹmy, Inynyry riwawiòhenanyre wahe. ¹³ Tahe wabedewomy watxiwãhã inyseriòreny Txitu-ki rahaõrekí. Tai tahe kia iny mahãdu reteòwarinyre arakremy Macedonia hãwã-ò rare.

¹⁴ Tahe Deuxu deysana! Deuxu-wana watxiwãhãreny. Tahe kia ijesu tai ritake. Kristu heka ridykre ijesu tarasadu mahãdu.

Rokoirenykre heka ihe-ki. ¹⁵ Iwese aderòna l̃nyrehekỹ ibutumy idi riàlànnyhỹre wese heka, kia wese inyboho roire. Ibutumy iny rierykemy heka ityhydỹ̃du mahãdu r̃yirerimy ihỹre. L̃nyrena wihikỹ Kristu ritoonyre wese Deuxu-ò inyboho roire. Iny l̃nyrena wese heka rare. Ityhydỹ̃du, ityhydỹ̃dukõdu mahãdu-ò ramyhỹre. ¹⁶ Kia rityhynyõmyhỹre mahãdu tahe, t̃nyre rirubunyre. Rityhynymyhỹre mahãdu tahe t̃nyre iruweselemy rare. Kia aõmys̃dỹ̃na biwinybenyke. Isirare heka iaõmys̃dỹ̃. ¹⁷ Inyboho heka s̃owemy inywese aõkõ iny roire. Iwese iny riwymyhỹre aõòwyriòre idi ijohomy, kia wese karybe rare. Kia Deuxu deòdu mahãdu heka iòwydimy aõkõ rybe riwymyhỹre. Tahe inyboho heka inatyhymy rarybemyhỹrenyre. Deuxu dori inydeereny rarybere òbitinamy. Riwateònyrenyre òbitina-di araryberenykemy.

3

¹ Timyre heka tyyriti ritididỹ̃namy raruõhyymahãrenyre jiarỹboho awirenyremy. Tahe waribireny tule aribireny kia Ritidỹ̃na arihurenyõtyhy. ² Kaiboho heka Kristu tyyriti wese aõma toite. Riritinymy heka roimyhỹre inywo-ki, inyrayky-ki. Idi riramy kaiboho burubenykeki, aõbo kaiboho tewinymahãte heka tamy betehebenyke. Tai tahe rierymy idi rariake ixideele. Idi rariake hãre tahe idi rexibedeerynyke. ³ Kaiboho heka Kristu tyyriti wese heka toite. Inydeereny iwahidỹ̃my heka tii rare. Kia tyyriti wixiramy rare. Aõ ritidỹ̃na manamy aõkõ riwinyreri. Deuxu Tyytybytyhy-di

tahe riwinyreri. Aõ manatyre-ki aõkõ ròritidỹỹreri inyraykyreny-ki, inyworeny-ki ròritidỹỹmyhỹre. ⁴ Deuxu heka retyhynmahãre, Kristu òraru-ki wahe. Tai tahe tuu raryberenymahãre kiawesemy. ⁵ Jiarỹboho heka warururenyõhyyre kaa aõmysỹdỹỹna widỹỹna-ò. Iny ruruna heka Deuxu-ribi sohojile nade. Tii iny wiòhedỹỹdu, aõ iny rikiwinymyhỹrenyke-ò wahe. ⁶⁻⁸ Irybe tỹmyra dohodỹỹdumy heka inyboho roire. Ihetxiu bede ywina wesemy aõko heka ròritidỹỹre Deuxu Tyytybytyhy ihỹre. Ihetxiu bede ywina heka rubu diwyde. Deuxu Tyytybytyhy iruna riwahinyre. Ihetxiu heka manatyre-ki ròritidỹỹre. Deuxu loosõna tule ròhõnyre, riwahinyreu wahe. Moisesi òsỹny-ribi sõwemy loosõna ròhõnyre. Idi tahe riixãwididỹỹnyre. Tahe judeu mahãdu reteheõhyymyhỹre iòsỹny-ò, iòsỹny loosõnadireki. Deuxu Tyytybytyhy heka iratyre awimy rare, iny-ò dori Deuxu irutyhy riwahinyre. Tahe bede ywina nade loosõna wiwihikỹ-di bede ywina tỹmyra tahe iratyre awi rare. ⁹ Tii heka iny-di ixãwikemy ratxireri. ¹⁰ Tahe iratyre rybe tỹmyra rare. Iny òraruna-di ixãwikemy ratxireri. ¹¹ Kia urihimyò rỹire awi rare. Iratyre tahe umytedeõna rare.

¹² Iny raròsõna sõwemy ratximyhỹrenyre. Tai tahe inyboho ruberuõhyymyhỹrenyre. ¹³ Moisesi wesemy aõkõ rakatximyhỹrenyke. Imahãdu raykytxymy dori rỹirenyre. ¹⁴⁻¹⁵ Imahãdutyxymy dori rỹirenyre. Moisesi bedeywina-di rariakeki, irayky ritòbõnyke. Kia rieryõrenyre iraykyreny ratxynymyhỹrenyremy. ¹⁶ Kristu rityhynyre xiery,

irayky raraymyhÿre. Iwese Moisesi òsÿnytòbòna iòsÿny-ribi resere wese kia rare. ¹⁷ Kia Tyyriti-ki Inynyrÿreny heka Deuxu Tyytybytyhy rare. Tikibo Deuxu Tyytybytyhy rÿikeki kowa ibutumy iny ixinamy rÿike. ¹⁸ Tahe ibutumy inyboho heka Deuxu wowydyna iny òsÿnÿreny-ki ijòdire. Iwese iny òsÿnyreny itxena-ki iny retehemyhÿ wese, Deuxu wowydyna ibutumy robimyhÿke iny òsÿnyreny-ki. Inynyrÿ he Deuxu Tyytybytyhy rare. Iribi tahe wowydyna nade. Kia wese inyboho heka Inynyrÿ wesemy relemyhÿreny. Inihikÿmy delemyhÿdenyde. Tii ðori iny worenny-ki raaòðataðtamyhÿre.

4

¹ Deuxu taruxetòena-di heka kia aòmÿsÿdÿÿna inydeereny diwahinyde. Tai heka ikonanakòdumy idi rakatximyhÿrenyke. ²⁻³ Ibutumy heka rikiwinymyhÿrenyke aòbo òbiti rare. Aòbina binahakÿ widÿÿ-ò heka rekexiijerenyke aòbo òbitirele heka rikiwinyrenyke; riki-wiurònyrenyòtyhy heka Deuxu rarybereriki, tuu. Deuxuruòhyyle rikiwinyrenyke. Inatyhyna loosòna-ki heka rakatxirennyke. Ibutumy heka rikiwinyrennyke ibutu itxerena òbitimy wahe. Inyboho ritÿnynymyhÿre Rybe tymyra wihikÿ. Inyò-ribi riwòmny roimyhÿkeki tahe kia rityhynyòmyhÿrele tuu ritidimny roike. ⁴ Kiakeki tahe Satanasi iitxeredÿÿ-ò riijònyreri loosònamny robike lau. Deuxu binadÿÿna rare. Ibinadÿÿdu wesemy ratxireri. Kaa loosòna-ò iny riitxeredÿÿnyhyymyhÿre aòma Rybewihikÿ tÿmyra-ò. Rarybemyhÿre ðori

Kristu heka Deuxu yrubule rare. ⁵ Iximy aõkõ rarybemahãrenyre. Inynyrỹ Jesuisi Kristulemy heka rarybemahãrenyre. Inyboho heka deòdumy inyboho ratximyhỹrenyre adeereny. Jesuisi òraru-ki kia rewinyamahãrenyre. ⁶ Juhuu Deuxu rarybere: —Bedeluru-ribi heka loosòna doosòmhyhỹde. Tii heka loosòna-di inyraykyreny ritoosònanymyhỹre. Tai heka iny Deuxu erysydỹỹna inyboho rieryrenyre. Kristu òsỹny-ki sohojile tuu rokobirenyke.

⁷ Kia heka aõna aõna wiwi inydeereny heka rare. Ihyna òwy riòre wesemy inyumyreny ratxireri, butxi weselemy wahe. Tai heka Deuxu sohojile irurudire, inyboho aõko irurudire. ⁸ Ihãrele heka aõbo iny riwinyke rieryõhyymyhỹre timybo aõ iny riwinyke heka. ⁹ Aõhõkỹmy dỹỹnana heka inydeereny rehemynymyhỹre tai inyboho ikyhynamy riemyhỹrenyre. Inyboho heka bedewodihyy ratximyhỹrenyre, tahe tiemy iny raròsònarenydihyy inyboho ratximyhỹrenyre. ¹⁰ Inyboho heka itxi tõhõti reahyy inyboho ratximyhỹrenyre, Jesuisi rubuna-txi wahe. Kaki tahe iwese Jesuisi raremyhỹ wese heka rakatxirenyke. Tai iny witxira heka tuu robikre kiamy, Jesuisi rirudỹỹnanamy. ¹¹ Jesuisi òraru-ki heka brebunahakỹ-ki inyboho roire. Kia wese-ki heka iny Jesuisi runamy robikre inykireny. ¹² Kia-ki heka iny rubukonanareny inykireny rare. Tahe iruna akireny tule ratximyhỹre. ¹³ Kiamy heka Ritidỹỹna roire: —Jiarỹ retyhynyre. Taita rarybere: —Kia weselemy roire. Retyhynyrenyreri tai heka

jiarỹboho tule raryberenyre. ¹⁴ Jesuisi ixixadyỹdu heka rare. Kaa tule inyboho tule riixixanyrenykre. Rikirònykre heka Deuxuko-txi. Kaiboho tule boibenyke wawanareny. ¹⁵ Jiarỹ wawanareny kia adeeremy relere. Tamy Deuxu ruxetòena sòwetyhymy ramyhỹre-wana heka riwahinymyhỹre iratyre sòwetyhymy tamy deàlàna riwahinymyhỹre. Kia heka Deuxu wowydyna-ò tuu ratximyhỹre. Bedewoõmy.

¹⁶ Iny bedewonaõhyyre heka. Iny umyreny retybynyre. Txuõ txuõlemy heka ratỹmyranyke inywo-ki. Tiie heka aõbo rierynyre inatyhyy wahe. ¹⁷ Iny bededỹnanareny heka urihimyòle roimyhỹre. Iny wowydynarenyko-ki heka aõhòkỹmy dỹnana inyboho ritarenyke inydireny retehemyhỹre. Retyhenyrenyre wowydyna-ò awityhyremy inyboho idi retehemyhỹre iny idi retehòmyhỹredi. ¹⁸ Aõbo iny tuu robimyhỹre bede bedemy tuu iny robimyhỹre ibutumy idi reamy. Aõbo iny tuu robiõmyhỹre heka tiu itueõtyhy. Kia-di tahe inyboho ròhòtinymyhỹre.

5

¹⁻² Inyummy tỹmyrahakỹ heka inydeeremy kidiwahinykre Deuxu, iwitxira biu bede-ki wahe. Aõ hãbu wahisidỹna-ki aõkò Deuxu-di wahisidỹna-ki heka tuukre kia umy tỹmyra wahe. Tiu heka itueõtyhy. Rakabedeworenykre heka bede-ki iny telesõreny-ki rasỹnyreki inywo-ki wahe. ³ Inyboho heka biubede-ki inysỹreny inyummytỹmyra-ki ròkòhòtinymyhỹrenyke. Kaa iny umyreny wahe. Rabedewomyhỹreny. Umy tỹmyraõ heka rikitarenykemy inyboho

ratximyhÿreny. ⁴ Aõherekibo inyboho wiji rabadeworenre? Inyboho heka Deuxu bedewihikÿ-ò aròirenykekõ aõbo? Inyreny rikitarenykemy aõkõ wiji. Kaki aõhõkÿmy dÿÿnana riwawobededÿÿnyra. Kia aõbo umy tÿmyra tyre tahe rikirutyrenyke ijõ wahe. Ijõ rikitarenykre umytuedeõnaõ. Tiu itueõtyhy. Kia riwinyre inydeereny kia wahe. ⁵ Deuxu dori tuu rarybereri inydee riwahinykremy. Tatytybytyhy dori diwahinyde diteòsinyde. ⁶ Kia iwese juhoo rarybere wese heka tuu rotÿÿnykre. Tai heka inyboho teysamy ratximyhÿreny. Kabede-ki inyboho ratximyhÿre heka inyumyreny ratximyhÿre heka aõ Inynyrÿ-wana aõkõ ratximyhÿre. ⁷ Tiu heka rokobirenyõtyhy rikityhynyrenykekile ka idi rakatxirenykre. Inyboho rieryreny timybo rarekre wahe. ⁸ Jiarÿ wadee awire kabede-ribi arexitate Deuxu-wana arasÿnyke wahe. ⁹ Aõma tamydeewimy heka tuu iny riwinyke wahe iny-wana rasÿnyke. Kaki iny ratximyhÿre tahe aõbo awire heka tamy awire. ¹⁰ Inydireny retehemyhÿre. Aõbo inyboho riwinymyhÿreny. Aõbina bina rikiwinyrenyke heka aõhõkÿmy dÿÿnana inydeereny riwahinykre. Aõwihikÿ riki rikiwinyrenyke wana tasÿ. Aõbo awityhy inydereny kidiwahinykre.

¹¹ Inynyrÿ heka inyboho rityhynymyhÿre. Tai inyboho iny witxira-ò tuu sõwemy relymyhÿreny. Ibutumy heka Deuxu iny rierymyhÿreny. Kaiboho heka tule tiwaerymahâtenyte. ¹² Kia heka reraðmy watximyhÿreny biwaerybenyke. Ararybeõtyhy heka adeereny jiarÿ awiremy. Tahe wadee

ka awire kaiboho waluurenyke. Hãbu iumyle awimy rÿirerimy ihÿremy idi rõhõtínymyhÿre. Tii heka òbiti aõkõ rare. Kia biwyònybenykemy adireny watzireri. ¹³ Juhuu iny rieryremy itelesõ. Inymyreny rarybekeki itxÿtemy inyboho roiremy. Rakaryberenyke heka aõbo inyboho dori Deuxu dee. Aõmysÿdÿÿrenymyhÿreki inydireny rõhõtínymyhÿre. Inymyreny rarybekeki inyboho awilerenyremy. Iòrarureny-ki tuu rakatxirenyke. ¹⁴ Kristu luuna heka kiamy iny riraykydÿÿnymyhÿre. Tii heka rurure iny ibutudee. Tii rurureu, ibutumy inyderòwyrenymy rurure. ¹⁵ Rurure heka aõma iny ixidee sohojile irumy rareke lau. Kia tako-ò rakreu tamy heka irumy rakre. Tamy dori rurure tai rexixare rubu-ribi. ¹⁶ Rakaraykynyrenyke timybo hãbu awiré, ibinaré. Kaimy heka rakaraykynyrenyke. Aõ iwese iny witxira raraykynymyhÿre wese aõkõ raraykynyrenyke. Aõma inyboho aõbo Jesuisi Kristu-di raraykynymyhÿre heka. Ixityre aõbo tuukre. ¹⁷ Tii heka umy tÿmyra tuedeõna-di ratximyhÿre iwitxira ratximyihÿre. Juhu iaõmydÿÿnana iribi ixãwira. Tahe wiji raraykywydynanyre iwitxiramy. Ibutumy iaõna aõna ihetxiu heka rawitxiranyre, awi-ò. ¹⁸ Deuxu heka ibutumy kia riwinyre tamy. Inyboho heka iòludu roire, juhUU wahe. Wiji tahe iliinamy ijoi ratximyhÿre. Iny witxira heka iliinamy rarekemy idi watxiwãhãre. ¹⁹ Wiji tahe timybo Kristu rarybekremy heka adeereny rarybereri. Aõma Deuxu kia liinamy rarekemy wahe. Ixinamy Deuxu. Ka Deuxu aõ anaumywitxiranydenyke.

Kia Kristu òraru-ki tuu ratximyhÿre.

²⁰ Jiarÿboho Deuxu deòdu roire. Tai Kristu deròwomy adeereny rarybereri: Iluuna ixidee ixyby bimybenyke. Wii biwowixinybenyke.

²¹ Deuxu heka iny òraruna ritidire Kristu tyre-ò. Kristu inyòrarunareny riwyre. Wiji tahe Deuxu òbitina inydeereny riwahinymyhÿre.

6

¹ Jiarÿboho tahe raaòmÿsÿdÿÿnyrenyke Deuxu dee. Deuxu ruxetòena dori tetatenyete, tai idi mohòtinybenyke, òhòtirenny-ribi losaòmÿkemy.

² Boholabenyke aòmÿbo Deuxu rarybereriò. Jiarÿ heka aluurenyre iurenana tahe ka arybe-ò raholareri. Arawiòhenarenyre iu wadee textitòenyteu, wadee taryteu. Boholake wiji heka bitabenyke Deuxu ruxetòena. Wiji heka biu-ò hena txumy bede rÿire.

³ Inyò iny aòmÿsÿdÿÿnarenymy ibinamy rarybekeki, uritere ijò iny bedeworenyòmÿ, jiarÿboho òraru-ki.

⁴⁻⁵ Jiarÿboho dori Deuxu deòdutyhy roire. Tai rikiteòsinyrenyke ibutumy aòbo inyboho dori Deuxu deòdu roire. Tai riteòsinyke ibutumy aòbo iny riwinymyhÿke. Aóna aóna rikiteòsinyrenyke. Òhòte wakireny rÿimyhÿre. Ròtenawo-ò ralòmÿyhÿrenyke. Bedeweweky-ki aòhòkÿmy ratÿÿnymyhÿre. Sòwemy heka reòludunyre aónana bina binahakÿ reòludunyre. Aò òta òta reòludunyre.

Sòwemy heka raaòmÿsÿdÿÿnynihikÿrenyke. Sòwemy heka aòmÿsÿdÿÿnadikre; tÿikò bede reijereny; byreòmÿ bede reijereny;

⁶ òbitimy heka rewinyrenyke. Aóna, ywiny-di

ròwidỹỹrenyre bedeeryna-di. Ka roirewãhã iny iwitxira rewiòhenanyre. Ibutumy kia rewiòhenanymy roirewãhã. Deuxu Tyytybytyhy heka wawanahyy roiremyhỹ. Luuna heka inydee reteòsinyrenyre Inatyhyna rybe heka retỹnynymahãrenyre. Sõwe heka ritỹnynymy, jiarỹboho Deuxu deòdu roire wahe. ⁷ Òbitina dori wadebònareny wese rare Satanasi itxemy. Jiarỹboho heka remymahãrenyre aritarenkemy. Tule iny rexiijemyhỹre òbitina-di. ⁸ Ijõ heka waluurenre inyõ tasỹ aõbina binahakỹle wadee riwinymyhỹre. Ijõ heka Rybewihikỹmy wadee raryberemyhỹre. Ijõ tasỹ rybe binamy wamyre, raujõmo. Inatyhyna rarybemyhỹre. Tai wamy ruidu riwaninimyhỹrenyre. ⁹ Ibutumy heka iny riwayreny. Tahe rieryõhyymy heka inatyhy rare. Watxiwãhãrenyre rubu wese ihãre tahe warumy watxiwãhãrenyre. Tiiboho heka rubu wesemy inydireny ratximyhỹrenyre. Aõhõkỹmy ratỹỹnyrenyre hãre raruõhyylemy watximyhỹrenyre. ¹⁰ Aõna aõna heka bedewonihikỹmy ròhõnyre. Tiiemy wadeysahyy watxiwãhãrenyre. Jiarỹboho heka urimynodule watxiwãhãrenyre. Ibutumy inyboho rityhydỹỹnyrenyre. Aõhomy aõkõ inyboho ratximyhyreny tahe ibutumy inydire roimyhỹrenyre.

¹¹⁻¹² Tahe kaiboho ityhydỹỹdu seriòre mahãdu Oritxi hãwã-ki. Jiarỹboho heka kaa òbiti-my aõna aõnamy rarybemyhỹre. Kaiboho heka ijohona de-rarenre aõmybo rarybemyhỹrenyreò. Jiarỹboho heka aluurenre. ¹³ Kai wariòre wesemy adee

rarybereri. Umy iwese jiarỹ aluure wese, kai waluurenyre.

¹⁴ Boholabenyke warybereny-ò ityhydỹdỹdukõdu mahãdu-wana aõmysỹdỹrenyõke. Timybo òbitinaõ heka aõbinaõ-wana raaõmysỹdỹke. Timybo heka loosõna bedeluru-wana ratxike? Aõkõre! Tiu wiwana rauriõtyhy. ¹⁵ Satanasi heka Kristu-wana raaõmysỹdỹnanyõtyhy. Itydyỹdu mahãdu wiwesehyyle raraykynykemy rỹira. Ityhydỹdỹdukõdu mahãdu-wana tahe wiraykyweseke aõkõre. ¹⁶ Deuxu aõmysỹdỹna heka iwitxi rare, suritxoo aõmydỹnana-ribi, wahe. Kaiboho heka Deuxu dohodỹna ijoimy toite Deuxu oworeny-ki ratximyhỹre. Deuxule heka kawesemy rarybere: —Jiarỹ heka wasỹ ariwinykre ayreny-ki. Jiarỹ iDeuxumy aronykre tiiboho waijoimy. Rorokurenykre. Tai tahe Inynyrỹ rarybere wiribi bihitxinyke. Inybina-ribi bexihitxinybenyke.

¹⁷ Bexiebenyke òbitikõre-ribi wahe. Uritere tamy adi rexihumy, ixieryta aramyrenykre ix-idee wariõre wese.

¹⁸ Warurutyhymy adee rarybere. Boomy heka adireny ararekre, jiarỹle wahe. Deuxu rurutere rare Jiarỹ.

7

¹⁻² Deuxu ibutumy tuu rarybere: —Kai ityhydỹdu waseriõre mahãdu. Tai tahe rikexiòbitinyke ibutu aõmydỹnana-ribi. Iny umyreny-ki rokobirenyke inyumyrenyy-ki. Òbitimy heka rakatxirenyke iko-ò, Deuxuko-ò. Aõma waluumy heka atximahãbenykemy

rahõtinywãhãrenyre. Iny-ò aõ bina bina rewinyõhywãhãrenyre. ³ Tuhe kaa rarybere tahe ixityre anarybekre. Aluurenyre jiarỹboho ibutuhyye ratximyhỹre iny rummy ratximyhỹre hãre tasỹ rukururenykre tulekre. ⁴ Wadee heka awire ibutummy kaiboho ratximyhỹrenyre. Kai aõwixira wixira wadeereny rỹira umy retyhynyreki. Isirare heka wadee kia ratximyhỹhãrele Wadeysatyhummy heka watxiwãhãre, wiõhedỹtyhy òraru-ki, ijyy òraru-ki.

⁵ Jiarỹboho retehemynyre Macedonia bede. Taita tule elehynaõhyyre wadereny. Ibutummy heka aõna aõna, òta òta wixira wixira; bede bede ihyyummy aõkõre rỹire tai. Aõma bedewonihikỹ heka watelesõreny-ò ralore. ⁶⁻⁷ Deuxu riwawiõhenanyrenyre; Txitu diteõnyde wadeereny. Tii rybereny heka awiremy kaiboho. Tai tahe reysarenyre jiarỹboho. Kaiboho tabedewomy atxitenyteri waòraru-ki. Katahe wadeysa nihikỹmy watxireri. ⁸ Adeereny warybetyyriti rewahinyreki tabedewomy atxitenyte. Tai tahe reysamy watxireri. Ihãrele heka tyyriti adeereny arawahinykre. Kaiboho heka tabedewotenyte iribi tahe aõmydỹna kaiboho tewixiranytenyte teõbitinytenyte ibutummy. ⁹ Tai tahe jiarỹ reysamy watxireri. Aõbinare dori rewinykõre arawiõhenyrenyre heka. ¹⁰⁻¹¹ Deuxu heka iny ribedeòtiidỹnymyhỹre iny ywimy riraykydỹnykemy. Kia kidiwymyhỹke inydee tarasana wahe. Tii heka awire. Ijõ bededeòtiidỹ tahe bede ludu bede òtiidỹ. Kia tahe rubu diwymyhỹde. Kaiboho heka tabedeòtiidỹnymyhỹtenyte. Deuxu heka

kia riwinyre awiòhedỹĩnami aõma kaiboho awirenyre. Aõ wixira wixira sõwemy akireny rỹireri, aõ òta òtareny. Kiadile tahe aõma òbitihyomy òhò ayreny-ribi kaiboho heka taykarananytenyte. Kaiboho heka waluudumy teletenyte. Kaiboho biwinybenykemy aõbo òbitimy ratximyhỹre iwidỹĩmy tarotenyte. Ibutumy heka òbitihyomy rarekemy idi tetehtenyte. ¹² Tai kia tyyriti adeereny rewahinyre. Aõ kia rewinyre heka aõ iny iòrarudikekile aõkõre rewinyre. Idi aretehekemy heka. Kaiboho waluurenytyhyre aõbo òraru-ki wahe. ¹³ Tai heka wadeysamy watxiwãhãre. Aõ inyboho sohojile aõkõre teysa ratximyhỹreny. Txitu tule teysamy ihỹmyhỹre, kaiboho tawiòhenanyteki ¹⁴ Tu heka rarybere adeereny kaiboho dori awimy tai tahatenyta awityhy. Adeereny heka inatyhyhy rarybemahãreny, inatyhynamy. Tule mobo rarybere Txitxu-ò. Ka tahe inatyhy rarybemy ratximyhỹre. ¹⁵ Tai heka Txitu kia luuna heka aõnityhymy akireny rare. Itxi heka tõhõti akireny aõma Deuxu tetyhynmahãte-txi. Kaiboho tedytenyteki. Ihãrele urihimyo ruberumy ratximyhỹ. ¹⁶ Reerymahãre jiarỹ kaiboho òbitimy boibekre. Tai wadeysamy watxireri.

8

¹ Deuxu ruxetòena-ki heka sõwemy riwinyre Macedonia dohodỹĩna mahãduy-ki wahe. Jiarỹ tuu arelyykemy idi watxireri waseriòreboho. ² Sõwemy heka iaõna aõnareny iaõòtaòtarenyre tiiboho. Aõhõkỹmy rotỹĩnyreri tiiboho. Ihãrele ka deysamy heka relereny. Reysareny heka.

Tiiboho heka iaõkõrenyrene. Aõhohomy aõkõ heka roiremyhỹ. Kiahãrele heka sõwemy riwahinyrene tamahãdu wiõhedỹỹmy. ³⁻⁵ Riwahinyrene heka sõwemy ixideewimy. Sõwemy riwahinykelemy wadee rarybere. Tiiboho heka sõwemy wiõhedỹỹmy rurumy roiremyhỹ. Tai inyboho ribedeõtiniyrene sõwerekini. Kia judea bedede, dohodỹỹna mahãdu, kia wiõhedỹỹmy. Juhu heka tiiboho rexiwahinyrenyrene Inynyrỹreny-ò. Tule Deuxu deewina inydee riwahinyrene. Iny wiõhedỹỹnarenymy rexiwahinyrene. ⁶ Tai tahe jiarỹ rarybereri Txitu-ò: —Kai biwiõhenanykemy iaõmydỹỹnareny-ò. ⁷ Kaiboho heka sõwemy tetyhynyteri. Kaiboho heka Deuxumy awimy tarybemyhỹtenyete. Kaiboho heka teerytenyete Deuxu aõmydỹỹnana. Kiaboho heka waluuureny waluuurenymy boibeke wawiõhedỹỹdurenymy. Biwawiõhenanybenyke. Tai heka sõwemy bexiòlòdỹỹnybenyke adireny watzireri. ⁸ Aõ bedede ywinaõ heka adeereny rewahinyõhyreri. Arierykemy heka idi watzireri timybo aluuna ratximyhỹremy. Tii riteòsiny heka timybo ijõ dowiõhedỹỹmyhỹdemy. Tai tahe iwese tii rotỹỹnyrene wese kaiboho tule botỹỹnykre. ⁹ Deuxu ruxetòena teerytenyete, Jesuisi Kristu ruxetòena wahe. Tii heka ityhy rare. Tii rikòdỹỹnyrene heka aòrarurenymy-ki. ¹⁰ Taihyky tetyhynytenyete Deuxu aõmydỹỹnana-di. Kiamy heka raraykynyreri. Arawiõhenanykemy heka adireny rahõtiniyrene kanau bedede. Tewiõhenanytenyete inatyhymy. Tai tahe biconananybenyke kia kanau bedede tewinytenyete heka biconananybenyke. ¹¹ Aõma

ireiõno, uriõno biwahinybenykeki, Deuxu heka rimyke. Kia-di rõhõtinyke. ¹² Kia uriõnomy idi teywinymy atxiteri-di rõhõtinyke. Tamy wahidỹỹmy aõkõhyykeki tahe Deuxu aõma raraykynyõtyhy. ¹³⁻¹⁴ Jiarỹ heka isiramy adee ariwinyõtyhy aõ. Kaiboho heka sõwemy kaa wiji toite, Tai tawowi-di inyõ ròõkeki, taaõnasõwe myna Deuxu-ò riwahinykre. Iaõkõkeki tai ibinamy Deuxu rahaõtyhy. Tai biwiõhenanybenyke heka ihoõmy rỹira mahãdu. Jiarỹ heka aõ retõenyre aõkõ rare, biwahinybenykemy. Kai ihoõmy atxikeki tahe, tule inywitxira anawiõhenanykre. Taita wiwanale wiwesehyyle ròhònykre. ¹⁵ Kiamy heka Tyyriti-ki Ritidỹỹna roire: —Hãbuõ heka sõwemy ributunyre. Tahe aõhe rauhenyõhyyre tamy kia ibutuna-ribi wahe. Ijõ tahe ibutelemy ributunyre hãbuõ wahe. Tiile heka aõ tamy rasiranyõhyyre.

¹⁶ Txitu awiõhedỹỹrenymy rurumyhỹre iwese awiõhedỹỹrenymy rurumyhãre wesele wahe. Deuxumy reâlãre tai, Deuxu dori tuu rotỹỹnyre. ¹⁷ Taita ixinamy arorarenymy rehemynykremy. ¹⁸ Riwiõhenanyrenyreri iwitxira seriõreõ. Ibutumy dohodỹỹna mahãdu-ribi tii rityhynymyhỹre aõma Rybewihikỹ-di ritỹnynymyhỹre awimy. ¹⁹ Dohodỹỹna mahãdu rihitxinyre wawana kanakemy. Ibutumy Inynyrỹ loosõna heka tuu ratximyhỹre. Tule riteõsinymyhỹre ibutumy iny rikiwiõhenanymyhỹrenykemy. Tai heka inyseriõreny reteõnyrenyreri ityhydỹỹdu mahãdu. ²⁰ Tai inyõ kia nierumy inyõ rarybeõtyhy. ²¹ Òbityhylemy rikiwinyrenyke ibuturu-ò.

22 Ijõ tii-wana rake. Reurihirenyre heka tii wiòhedỹmy rakeò, tai heka tii wiòhedỹmy ratxireri. ²³ Txitu heka waliina rare; wawana raaõmysỹdỹnynmyhỹre heka rare. Jiarỹboho heka awiòhedỹrenymy rarumahãrenyre. Ijõ seriòrenenyõ nade dohodỹna-ò wiòhedỹmy. Tai kaiboho wowydyna tamy biwahinybenyke. ²⁴ Tai tahe dohodỹna mahãdu kaki rierykre. Tai rityhynyrenykre aõmybo umyreny rarybere. Tule wiluumy atxiteri.

9

¹ Reerywãhãre jiarỹ wiòhedỹmy tarumahãtenyete Judeia bedeki. Tahe kiamy aõ aõkõ ariritinykre. ² Reerywãhãre timybo akireny rare. Jiarỹboho heka awimy raryberenyre umyreny Macedonia hãwã mahãdu-ò. Myheka rarybere: —Akaia bede seriòre mahãdu wiòhedỹmy rexiywinymy ratximahãrenyre kau beòrau. Tai tiiboho rexideysananyrenyre. ³ Tai heka kaa seriòre mahãdu reteònyreri. Tai heka awikre biwiòhenanybenykre dori. Kiamy iwese rarybereri heka inatyhy rare. ⁴ Araixỹrukre heka jiarỹ aõma bexiywinybenyõlemy wiòhedỹna-ò atxibenykre-wana. Tule kaiboho maixỹrubenyke. ⁵ Tai heka inyseriòreneny reteònyre akorenymy. Tahe iu arehemynykreu, bexiywinybenyke. Biwahinybenyke wiòhedỹmy atxitenyteri ixideewimy. Aõ jiarỹ adeereny rexitònyreri aõkõ wiòhedỹmy.

⁶ Kia hãbu ibutemy ròbòròmỹhỹre heka ibutelemy tamy aõna aõna ruhunykre. Kia hãbu sõwemy ribrònymỹhỹre tahe tamy sỹ sõwemy

aõna aõna ruhunymyhÿre tamy riwahinykre bederaty aõmydÿÿnana. ⁷ Tai heka iny sohoji sohoji ixideewimy tiwesebo riwahinymyhÿke. Riwahinyõke tahe aõ tuu rurukõreri urenana tuu ratxike. Deuxu dee riwahinymyhÿke mahãdu deysana-di riwahinymyhÿre kia iny mahãdu Deuxu tuure. ⁸ Deuxu heka riwahinymyhÿre sõwemy aõmybo tarumahãte kia inydeereny iratyre. Ibutumy aõmybo tarumahãte heka tule iny witxira biwiõhenanybenyke. ⁹ Kiamy Ritidÿÿna-ki roire: —Tii tawowi-di iaõkõ mahãdu-ò. Rõwahimyhÿre. Kia tahe iinydee wobrona tiemy rosaõmy rarekre. Deuxu heka riwahinymyhÿre tibo alõbõrõdu-ò. ¹⁰ Inydee riwahinymyhÿre paõ iny rirÿsÿke. Tahe tule sohoji sohoji õwõrutymy rurumyhÿre heka tamy riwahinymyhÿre. Kia ribõrõnymyhÿre tahe Deuxule ritxuhudÿÿmyhÿre. Tahe sõwemy bitakre Deuxu-ribi. ¹¹ Kia rimymyhÿre mahãdu tahe Deuxumy reàlãmyhÿre. Kia tewinymahãte heka Deuxudeewimy tewiõhenanymahãte. Deuxu heka sõwemy rimymyhÿre eàlãnareny iõraru-ki. ¹² Kaiboho heka Deuxu mahãdu teriwiõhenanytenyete. Kia sohojile aõkõ. Tule aõraru-ki tiiboho Deuxu-ò wowydyna sõwemy riwahinyrenyke. ¹³ Kaiboho Rybewihikÿ tÿmyra tetyhynytenyteri, Kia ibutumy rierymyhÿre kaiboho dori uriõno tewiõhenanytenyteki, tai iny wowydyna Deuxu-ò riwahinykre. ¹⁴ Adee rexitõenykre aluumy heka relekre Deuxu adee ruxetõena riwahinyreki. ¹⁵ Deuxu-ò wowydyna iny-ribi kanakemy heka idi watxireri. Wahidÿÿna wihikÿ dori Deuxu inydeereny riwawahinyre.

10

¹ Jiarỹ Paulo heka aõmybo adeeremy arexitòenykre. Aõherekibo tamy tarabemahãtenyete awanareny watxiwãhãu urihimyòle watyhyna watxirerimy wamy tarybemahãtenyete. Jiarỹ heka awana rybetere-di rarybeõmahãre awanareny watxireri wana. Tiu rareu, taheka ròritidỹỹre rybetere-di wahe. ² Rõhõtinywãhãre. Rexitòenyneri. Awi heka rare. Ywina-di iny risỹnymyhỹre. Inyõ wamyreny ibinamy rarybekeki tahe tule ararybeke heka. ³ Inatyhymy kabede-ki inyboho rasỹnymyhỹreny. Rakaaõbinanykeki, inyumyreny aõbinana wesemy rare. Tebõnadirenyre. ⁴ Tebõnadirenyre. Aõ kabledemy iny rỹira kia debõna wese aõkõ kỹny. Deuxu debõna heka rỹira irurule heka rare. ⁵ Inyõ aõbinamy Deuxumy rarybemyhỹkeki, tai tahe kia wadebõnareny remy resehãhãrenyre kia ixãwididỹỹnamy wahe. Ibutumy Deuxu òludumy ratximyhỹre heka remywãhãrenyre Deuxu rierykemy Kristu rityhynkemy wahe. Kaiboho heka ibutumy tetyhynmahãtenyete. ⁶ Kaiboho biatybenykeki, tahe, rexihuyymy rỹimyhỹre aõhõkỹmy dỹỹnana-ò. ⁷ Kaiboho heka tetehemahãtenyete aõna aõna-ò ahana-ribi wesele wahe. Inyõrarakynykeki ratximyhỹreny ixinamy tuu raraykynyke. Jiarỹboho heka tule Kristu mahãdu hõrõ iny ratxirenyneri. ⁸⁻⁹ Deuxu heka ruruõ wadee diwahinyde arawiõhenanykemy tai raixruõmyhỹre. Tai heka abrebudỹỹreny aõbo kariti rewinyre. Urile tahe aumydỹỹreny adireny rewisỹnywãhãre aõ bede arãatyremy aõkõ. ¹⁰⁻¹¹ Ityyriti

rybetere heka ribrebudỹỹ tahe rehemynyreu heka tii aõkõ rybetere-di rarybemyhỹre. Awityhymy aõkõ rarybemyhỹre riritinyreu. Iwese ròritidỹỹre wesemy aõkõ rarybere. Iu adehemynykreu tahe, iwese ròritidỹỹre wesele heka anarybekre. ¹² Iny tai ratximyhỹre heka sõwemy ixidi rõhõtinyinmyhỹre tii awiremy. Kia tahe watximyhỹreny kia raryberenyõtyhy. Tii dori raitxỹtemy ratximyhỹ. ¹³ Aõmy iximy rarybemyhỹre dori tii awimy iximy rarybemyhỹre heka urile tuu raraykynymyhỹ. Timybo Deuxu inydee raryberele rikiraòmyhỹke. Kiawesele inydeereny awire. ¹⁴ Iaõmysỹdỹỹna heka timybo rikiwinyrenykele iny riijemyhỹreny. Juhu heka Rybe tỹmyra wihikỹ heka adeereny adiwykemy idi watxiwãhãre. Rewyreny heka juhoo Rybe tỹmyra wihikỹ adeereny rewyre. Tai heka tuu raryberenyõhyymahãreny timybo iny witxira aõmysỹdỹỹna riwinymyhỹreny. ¹⁵ Kaiboho heka aityhydỹỹnareny raumynykre. Tii heka wadeereny awire. Jiarỹboho heka aõmysỹdỹỹna wihikỹ sõwemy ariwinyrenyky watzirenyreri ayreny-ki, Deuxudeewireki. ¹⁶ Idi tahe aròirenykre rybe-di aritỹnyrenykyremy ijõbede-ò, Rybe tỹmyra wihikỹ-di wahe. Aõmy ararybeõtyhy aaõmysỹdỹỹnareny iwitxira rewinyremy. Kiamy heka Ritidỹỹna-ki roire: ¹⁷ —Urile tuu rybe rỹike Inynyrỹ timybo riwinyrelemy. ¹⁸ Iny ixidi rõhõtinyinmyhỹre tii awireny. Tahe awi aõkõ rare Deuxu-ò. Deuxu tahe awimy tai rahamyhỹre tii idile rõhõtinyinmyhỹreki.

11

¹ Jiarỹ òsana urihimyò raitxỹtemahãremy kaiboho wawana tòiterimy ixi-di atxitenyteri. Ihãrele taheka urihimyò reòludunymahãre. Jiarỹ heka okorenyre iwese Deuxu ratximyhỹre wesele. ² Ywimy atximahãbeny adireny watxireri. Kaiboho iwese ijadòma hãbumy roikre wese toite. Hãbu heka Kristu rare. ³ Jiarỹboho raberuwãhãrenyre kaiboho Kristu-wana atximahãbenyke lau wahe. Iwese Eva hemylala riitxenanyre wese wahe. ⁴ Inyõ kanakeki ròhãletedỹỹmy Jesuisi witxiramy. Tahe kaiboho bityhynybenykekile jiarỹ heka raberumahãre. ⁵ Ijõ dori ritỹnynymyhỹre iwese inyboho ritỹnynymyhỹrenyre wese aõkõ iwitxiramy. ⁶ Kaiboho heka tahõtinyinmahãtenynte tỹnydỹỹdu wihikỹmy inykireny ratximyhỹre. Tahe awiremy idi tahõtinyinmahãtenynte. Tai iwesele inyboho roire awi heka roire. ⁷ Tahe iwese tii awityhymy rarybemyhỹre wesemy aõkõ inyboho rarybemyhỹrenyre. Tahe iny rierymyhỹrenyre inyraykyreny-ki. Sõwemy heka tuu adeereny rarybemahãrenyre. Iu jiarỹ rybe ritỹnynymy akireny rarewãhãu, kiau heka adeereny rexitòenyõhyyre iòwydỹỹmy. Iyjamy heka ixidee reijenynyrenyre kaiboho bexiòlònybenykemy. Teòsare òsana iwese rewinyre wese. ⁸ Ijõ dohodỹỹna mahãduõ heka riwaòwynyre adeereny aritỹnynyrenykemy. Iwese iribi rawasinyre wesemy heka rahõtinyre. ⁹ Iu akireny rybe-di tỹnydỹỹmy rarewãhãu tiu rexitòenyõhyyre adeereny biwawiòhenanykemy. Macedonia

hãwã-ribi dori ityhydÿÿdu, mahãdu seriòreõ aõmybo raruwãhãre wadee diwyde. Tiu heka aõ aribireny aritaõtyhy. Tuu rarehyy wese heka wiji rarekre. ¹⁰ Kristu inatyhynamy wadee rarybereri kia wese tule ararybekre ibutumy Akaia hãwã hãwã-ki. ¹¹ Jiarÿ heka aluunihikÿreny. Taile heka tuu rarybewãhãre Deuxule rierye. ¹² Kia rybe tÿnydÿÿdu heka iwese rewinywãhãreny wesele ròwidÿÿmyhÿre. Kia heka rewinywãhãreny heka kia rarybereri heka aõ wiribi lahitxi aõkõmy rarybereri. ¹³ Kahãbu heka inatyhy Deuxu deòdÿÿna aõkõ ratximyhÿre. Ruile heka iaõmysÿdÿÿna-ki ròhònymyhÿre. Rexitÿnynykemy Kristu deòdÿÿna mahãdu-ò. ¹⁴ Tahe aõkõre heka Satanasi tule rexiwixiranymyhÿre. ÿju wesemy tii rexideòsinymyhÿre. Kia hãbu teòdu rare. Tai heka irehemy iribi rexiijaranyre òbiti deòdu mahãdu ratxireriki wahe. ¹⁵ Urile tuu iny idi ròhõtinykelemy heka tuu ratxirerimy ihÿre. Tahe aõkõre. Ikonanau tahe aõhõkÿmy dÿÿnana ritarenkyre aõbo riwinymyhÿre òraru-ki.

¹⁶ Ixityre tuu ararybekre. Inyõ raykykõmy jiarÿ itxÿte raremy. Ararybekre heka waaõmydÿÿnanarenymy. ¹⁷ Teramy ijirarenÿomyke aõmybo ararybekre. Deuxu dori tuu arybedÿÿ-ò riwajjõnymy, tai heka rarybere itxÿte wesele watximahãremy. ¹⁸ Kaiboho heka taholamahãtenyete itxÿte mahãdu-ò. Katahe bodoholabedenkyre aõmybo ararybekre. ¹⁹ Inyõ kedehemynykeki kaa biwinybenkyre. Tahe tewinymahãtenyete aõna aõnamy aõkõ wahe. ²⁰ Inyõ

araitxenanyrenykeki uritere aõmydÿÿrenyõmy tamy. Jiarÿ heka ariwinyõtyhy tuu, wadee awiõre. ²¹ Ijõ rarybemyhÿre inyõ. Tule jiarÿ ararybekre. Itxÿte wesemy ratximyhÿremy. ²² Tii heka Hebreu mahådumy tii rexininire. Jiarÿ tule kia tuu rare. Ijaò mahådumy heka tiiboho rexininirenyre. Jiarÿ tule. Abraõ riokoremy rarybemyhÿre. Jiarÿ tuleri. ²³ Kristu deòdumy heka tii rexininimyhÿre. Rarybemahãre itxÿte wesemy. Jiarÿ heka iratyre deòduwimy watxiwãhãre. Jiarÿ raaõmysÿdÿÿ nihikÿre. Ròtenawo-ò riwarutyrenyre iratyre. Riwahatenyrenyre iratyre. Arurure inihe iratyre. ²⁴ Judeu mahãdu heka 39 hetenamy wamy raòhòtere iruyre sòwemy wahe. ²⁵ Roma mahãdu tasÿ inataõmy riwahatenyre. Sohoji ta mana-di watyure rihure. Ijõtxu heka hãwoninihikÿ heka riorore. Aõutxu heka bera-ki rãire ruu ibutumy txuu tule ibutumy rehure. ²⁶ Ibutumy reamy rarewãhã aõma wasidu bede aõmydÿÿnanamy bera-ki tule arurure inihe. Judeu mahãdu warubudÿÿmy wadi riwisÿnyre. Tule judeukõdu mahãdu tulere. Hãwãhãkÿ-ki brebunatyhymy watxiwãhã, bede rahy-ki tule, ahohokÿ-ki tule. Waliinaõ inatyhy aõkõ tai ihÿmyhÿ. Tai heka riwaitxenanyrenyre. ²⁷ Aõmysÿdÿÿ nihikÿ tai. Tÿikõhyky heka bede reijemy rarewãhã. Rama riwasare; bemy rarowãhãre. Timy heka tÿinatykyõ ihoõhykyre sòwemy wahe. ²⁸ Tai tahe rahòtinyre ibutu dohodÿÿna mahãdu-di. ²⁹ Urihimyòle taruru-di ratxireri wana jiarÿ tule iheki waruruhohomy aõkõ relemahãre. ³⁰ Inyõ raòrarunymyhÿre wana jiarÿ rabadewowãhãre

iòraru-ki. Jiarỹ rexideòsinywãhãre waaõkõre urityhywãhãre. ³¹ Deuxu Jesuisi Kristu tyby dori riwaerymyhỹre aõu aõu heka iny rakanihikỹnykre. ³² Iu Damasu hãwã-ki rarewãhãu, Iòlò Areta bede dinodu heka riwamymy riwateònyre. riwamykemy hãwãhakỹry ijò-ò. ³³ Weriri nihikỹwomy riwawòmý riwatidire, Walina mahãdu. Tahe heto raro-ribi riwaatyre hãwã ahana-ò. Tai tahe rahenyre iribi.

12

¹ Jiarỹ heka ararybekemy watzireri. Aõ aõkõ rarehãrele heka ararybekemy watzireri. Wiòhedỹỹna aõkõ heka rare. Wanyrỹ wadee riwahinyre aõna aõnamy heka rabire rasina wese jiarỹ sohojile wahe. Kiamy heka arelyykre wiji. ²⁻³ Tahe 14 beòramy heka Deuxu ityhydỹỹduõ ridyre biu-ò tasỹ-ò wahe. Deuxule rierymyhyre inatyhy aõbo rare ada aõkõre aõbo. ⁴ Kahãbu Deuxu-ribi heka rybeõkemy roholare. Tahe rarybeõtyhy. ⁵ Iximy tahe ararybeõkre kia wadeysarehãre. Waaõhõkỹmy dỹỹnanadile areysakre. ⁶ Urile ararybekre timybo releremy. Taile tahe iny tuu rarybekre. Tuheka rabire sõwemy aõwihikỹmy. Jiarỹ awiremy iny wamy raraykynyheny. ⁷ Tahe Satanasi aõbinana witzirahakỹbo wadee riwahinyre. Ixidi arõhõtinyõkre. Jiarỹ aõwihikỹ jiarỹ raremy wahe. Araraykynyõkemy. ⁸ Inataõmy heka Inynyrỹ-ò rexitòenyre kiamy waribi ritakemy. ⁹ Tii wadee rarybere: —Waruxetòenale heka adee awire. Aõbo kai taaõkõteu heka waruru adee rewahinyre. —Tai tahe jiarỹ reysare, waaõkõreu

wahe. ¹⁰ Tahe awire, waõkõna, warurukõna, ibutumy wadee awire. Kristu òraru-ki heka tuure. Tiubo ibinamy wamy riwinykreu warurukõkreu, warurudikre.

¹¹ Rarybere heka hãbu itxÿte wesele heka rarybereri. Kaiboho iòrarureny-ki heka kia wesemy rarybereri. Inatyhymy heka jiarÿ kia rybe tÿnydÿÿdu mahãdu bina ratyre watxiwãhãre. Ayreny-ki rarewãhãu heka teertyentye. ¹² Aõna aõna wiwihikÿ, deytana wihikÿ, bedeòtiidÿÿna ayreny-ki rewinyre kia Kristu deòdumy watximyhÿreki wahe. ¹³ Rybe tÿnydÿÿ òwyõ heka aribireny retaõhyre.

¹⁴ Ihewoludu txu tahe aroramy arakemy ixidi watxireri. Inataõmy reywinyra aroramy arakremy wahe. Aribi nieruõ aritaõtyhy. Urile arawiòhenanyrenykremy adireny watxireri. Uladu riki heka tyby riyrubunyõtyhy. Tyby tahe uladu riyrubunymyhÿre. ¹⁵ Ibutumy idi watxireri heka arahukre arawiòhenanyrenykremy. Adeereny wylemy arihukre. Jiarÿ heka aluurenyre. Kaiboho aõbo tule waluurenykre? ¹⁶ Waòraru-ki heka adee isiraõkre heka. Ihãrele tahe inybina wamy rarybemyhÿre: —Tii itxenadÿÿdu rare. ¹⁷ Wamahãdu tule aribireny ritaõtyhy ijõ. ¹⁸ Txitu reteònyraijõ ityhydÿÿdu seriòreõ-wana. Tii aõbo aõ aribireny ritare? Aõkõre. Txitu wawesele heka tii rare.

¹⁹ Taõmysÿdÿÿna heka awiòhedÿÿnarenymy rare. Aõ wadi jiarÿ awiremy nohõtirenyõmy tuheka rarybereri adeereny. Deuxu, Kristudeewinamy heka tuu adeereny rarybereri heka. Deuxu kotxi heka adeereny rarybereri awiòhedÿÿrenymy.

20 Raberumahãre heka arehemynykreu, iwitxiramy atxibenybeke lau. Tule wadi iwitxiramy betehebentyke ixiweserenymy aõkõ. Ihãru, adebure. Aõkemy watzireri. Iny aõbina binamy wimy rarybemyhỹre. Iny ixidile rõhõtinyrerimy ihỹre mahãdu. Kia aroholakeki tahe wadee awiõre. Riyrubunymyhỹre. Riyrubunyõhyymyhỹre. 21 Raberuwãhãre heka arahinykre heka akotxireny iõhãru òraru-ki. Aõna aõna witxira witxira òta òtamy rõhõtinyymyhỹre, raraykynymyhỹre. Sõwemy heka riwinyre ta ixi-txi tõhõti reaõhyymyhỹre kia riwinyretxi.

13

1 Tahe ikonana txu roraludu heka jiarỹ rare. Inyõ aõbina binamy wimy rarybemyhỹreki waribi ihitxihitximy heka tuu rarybemyhỹre. Iny rimymyhỹre heka tuu robimyhỹre; tuu rarybemyhỹre. Wiweselemy heka tuu rarybekre. 2 Iny iõrarudimy rỹikre-wana, ibutumy heka aõhõkỹmy rotỹỹnykre arehemynykreu. 3 Aõmy Kristu rybemy heka rarybekre. Tai bierybenykre. Aõmy warurudỹỹdure heka bierybenykre Kristu wahe. 4 Kristu heka itxeò-ki rurure irururenyõ wahe. Jiarỹ warurunarenykõ òraru-ki. Tahe Deuxu ratximyhỹre, iruruna-di. Tii-wana heka inyboho heka ratximyhỹrenyire iruruõmy. Tai awanarenyle watzireri, tahe tii-wana Deuxu ruruna-wana watzireri. 5 Ixi-di heka betehebentyke. Bexiurihibentyke tyhyna-di atxitenyterimy. Jesuisi Kristu awo-ki watzireri. 6 Kia terytenytemy, inatyhy. Tahe jiarỹboho inatyhymy aõna aõna riijerenyire. Kia aõbo

teerytenyte. ⁷ Jiarỹboho rexitòenyrenywãhãrenyre. Òraruna widỹỹrenyõmykemy. Kaiboho aõwiwi biwinybenyke. Kia òbitimy watximyhỹrenyrenki aõkõ, kiemy òbitimy boibenykemy. ⁸ Aõbo heka inatyhyna wiòhedỹỹnale rikiwinyrenyke. ⁹ Kaiboho arurudimy atxitenyteri-wana heka, jiarỹboho warurudimy watxiwãhãrenyre, kia wadeereny awi rare. Rexitòenymahãrenyre kaiboho òbitimy matxibenybekemy, ywimy ahãbenykemy. ¹⁰ Tai heka adeereny ratyyritinyreri kiamy. Aribireny irehemy watxiwãhãre taheka arawiòhenanyrenyke. Arehemynykreu tahe timy heka aõhõkỹmydỹỹnanamy arõhõtinyõtyhy, kia waaõmysỹdỹỹna rare. Inynyrỹ dori iny wiòhedỹỹnarenymy nade. Iny aõhõkỹmy dỹỹnanamy aõkõ.

¹¹ Arakre tahe waseriòreboho. Idi biwisỹnybenyke ibutumy òbitimy biwinybenykemy. Warybe-ò heka boholabenyke. Wiwese weselemy maraykywydynanybenyke wiribihiximy aõkõ. Ywina-di matximahãbenyke. Deuxuluuna heka tule akireny ratxikre. ¹² Wii birybenymyhỹbenyke ityhydỹỹdu seriòre mahãduõ tai wiluumy atximahãbenyke. ¹³ Ibutumy Deuxu ijoi mahãdu heka adee rybe riwehityhynanyreri. ¹⁴ Jesuisi Kristu Inynyrỹ ruxetòena heka akirenykemy watxireri. Deuxu luuna aki rỹikre. Deuxu Tytybytyhy awana rỹikre.

Deuxu Rybe Tyyriti **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 11 Nov 2022 from source files
dated 29 Jan 2022

55ce0bcd-101e-52a3-984e-847027efe150